

IVAKAMACALA TAUMADA VEI QASENIVULI

Ni ko vakarautaki iko vakayalo mo vakatavulica na lesoni oqo, yalovinaka wilika ka vakasamataka na veika oqo: Sa vakarota vakaoqo na Turaga, “Mo vakavinavinakataka vua na Turaga na nomu Kalou na nona isolisoli kecega” (V&V 59:7). Sa dodonu ga me da dau vakaraitaka na noda vakavinavinaka vua na Kalou ena vuku ni vakaitamera ni veivakalougatataki e solia vei keda o Koya. Sa dodonu talega vakakina me da dau vakavinavinaka vei ira na noda itubutubu, qasenivuli, itokani, kei ira tale eso era dau vukeyi keda tiko mai. (Raica talega na Same 100:3–4.)

VAKAVAKARAU

- Wilika na Luke 17:11–19, ka vakarautaki iko mo tukuna vakalekaleka na kedra italanoa na lewe 10 na tamata tauvi vukavuka.
- Vakarautaka toka mai edua na iVolatabu. Vakatakilakilataka toka na Luke 17:11–19 me rawarawa kina na nomu cega.

VULI MAI NA ITAVIQARAVI

Tekivu ena dua na itaviqaravi ni veivakasoqoni. Me baleta na kena vakasama, raica na tabana e 3.

Masu Sureta e dua na gone me cabora na idola masu.

iVakavuvuli Vakalotu Tukuna vei ira na gone ni sa ka levu dina sara na veivakalougatataki sa solia mai vei keda na Tamada Vakalomalagi, o ya me vakataka na yagoda, na kau kei na manumanu, noda matavuvale, vata kei na Lotu. Vakamacalataka ni sa rawa me da vakaraitaka na noda lomani Koya ena noda kaya “vinaka vakalevu” ka sa rawa talega me da kaya “vinaka vakalevu” kivei ira na noda matavuvale kei na itokani kei ira eso era vakayacora na veika e vinaka vei keda.

iTalanoa mai na iVolanikalou Vakaraitaka na iyaloalo e tiko ena tabana e 66. Dusi Jisu kei ira na tamata era tauvimate bibi tu. Cega na iVolatabu ki na Luke 17:11–19 ka tukuna na kedra-tou italanoa na 10 na tamata tauvi vukavuka. Oqo e dua na kena ivakaraitaki: Era a lewe 10 na tamata era a tauvimate bibi sara. A qai vakabulai ira o Jisu ka ra bula vinaka sara (*dusi Jisu ena iyaloalo*). Sa dua na ka na nodra marau (*dusi ira na tamata vukavuka ena iyaloalo*). Ia e a dua ga vei iratou na tamata oqo e a qai kaya “vinaka vakalevu” kivei Jisu (*dusi koya na tamata vukavuka ena iyaloalo a vakaraitaka na nona vakavinavinaka*). Sa rawa me da kaya “vinaka vakalevu” (*sureti ira na gone me ra kaya “vinaka vakalevu”*).

iYaloalo Vakaraitaka na iyaloalo e tiko ena tabana e 67. Tukuna vei ira na gone ni da vakaraitaka na noda lomana na Tamada Vakalomalagi ena noda vakavinavinakataki Koya ena veika kecega e solia mai vei keda. Dusi ki na dua na iyaloalo ka sureti ira na gone me ra vakayacora e dua na ivukivuki e baleta tiko na iyaya o ya (me vakataka na nodra laveliga sara e cake ka me ra vakatakarakarataka e ligadra e dua na doka ni vale, vakatakarakarataka ni beti vuata ka kania sara, vakatakarakarataka ni dara e dua na ivava, kei na so tale). Me vakayacori talega ki na iyaloalo yadua.

Sere Lagata se cavuta na ika 1 kei na ika 2 ni qaqa ni sere “Thanks to Our Father” (*Children’s Songbook*, 20) ka matanataka na qaqa na e ra. Sureti ira na gone me ra tomani iko.

Keimami na vakavinavinaka yani vei Tamada, (*rogo liga*)
Ni solia vei keda na ka kecega. (*dedeka raraba na ligamuni ruarua*)
Na mata kei na daliga kei na yava, (*dusia na mata. daliga, liga, kei na yava*)
Na isulu me daramaki, (*dusia na isulu*) kei na kakana me da kania. (*vakatakarakarataka ni ko sa kana tiko*)



IWALEWALE NI VEIVAKAVULICI

iTaviqaravi ni vakasoqoni mai: Era dau marautaka na gone ni sa dau tiko e dua na ituvatuva tudei kei na veitarararavi ni itaviqaravi era sa vakamatautaki kina. Oqo ena vukeyi me ra dau vakarorogo kina vagumatua ka vakaitavitaki ira.

iTalanoa: Mo dau nanumi ira na gone e dau dredre na nodra ciqociqo. Kakua ni vakayagataka na ivosavosa vakagone se na vosa e dredre. Me kena ivakaraitaki, vakayagataka ga “tamata era tauvimate bibi” ka sega ni “vukavuka.”

iTinitini Kerei ira na gone me ra kaya “vinaka vakalevu.” Vakaraitaka vakalekaleka na nomu vakavinavinaka vua na Tamada Vakalomalagi kei Jisu Karisito.

Masu Sureta e dua na gone me cabora na isogo masu.

NA ITAVIQARAVI ME DIGITAKI

VAKAVAKARAU *Me baleta na itaviqaravi ni iyaloalo:* Vakaraudaka mai na veiyaloalo ni veika ko sa vakavinavinaka kina; sa rawa mo na vakayagataka na veiyaloalo era tu ena ivolavakarau oqo se ena mekesini ni Lotu, se mo droinitaka ga na nomu. *Me baleta na itaviqaravi ni rokarokataki kei na qito ni veisa:* Lavetaka na iyaloalo e tiko ena tabana e 67 me ra rokataka na gone yadua. Vakaraudaka mai eso na tiki ni pepa lalai se dua na kena e tautauvata me ra na mai vakayagataka na gone me nodra ivakatakilakila ni qito ni veisa; me vakaraudaki mai vakalevu me ra mai ya-va na gone na ivakatakilakila.

Malanivosa me Matanataki Tukuna vei ira na gone ni da sa vakavinavinaka vakalevu vua na Tamada Vakalomalagi ena vuku ni yagoda. Sureti ira na gone me ra tucake ka vakayacora vata kei iko na malanivosa me matanataki oqo. Mo tauyavutaka na ivukivuki e tukuna tiko na vosa oqo.


Tara na matamu, tara na ucumu,
Tara na daligamu, tara na iqaqalo ni yavamu.
Dedeka cake sara na ligamu ruarua,
E cake sara, ki lomalagi.
Tara ena ligamu ruarua na ulumu.
Dabe sobu vakamalua ena nomu idabedabe.

Dusia na gusumu ka kaya, “Au sa vakavinavinakataka na gusuqu.” Kerei ira na gone me ra cavuta talega ka matanataka. Vakayacora talega ki na matamu, ucumu, daliga, liga, kei na yava. Sureti ira na gone me ra vakatututaka mai na veika eso era sa vakavinavinaka kina, ka cavuta tale na malanivosa era kaya.

iYaloalo Vakaraudaka vei ira na gone na iyaloalo ko sa vakaraudaka mai ka mo na vakamacalataka vakalekaleka na vuna o sa vakavinavinakataka kina na veika oqo. Sureti ira na gone me ra cavuta e dua na ka era sa vakavinavinaka kina.

Rokarokataki Me ra rokataka na gone na ilavelave ni tabana e 67. Ena gauna era sa rokarokataki tiko kina, dusia na veika era vakaraudaki tiko ena iyaloalo ka vakamacalataka vei ira na gone na veika era sa rokataka tiko. Wilika vei ira na ivakamacala e tiko ena iyaloalo o ya.


Qito ni Veisa Solia vei ira na gone yadua e va na tiki ni pepa lalai. Vakaraudaka na iyaloalo e tiko ena tabana e 67, dusia na kedratou iyaloalo na matavuvale, ka wilika na kena ivakamacala kivei ira na gone. Sureti ira na gone me ra biuta e dua na tiki ni pepa ki na matavuvale ena nodra dui ilavelave ni iyaloalo. Sureti ira me ra cavuta vata tale kei iko na malanivosa e tiko ena iyaloalo. Vakayacora na ka oqo ki na veiyaloalo kece sara.




IWALEWALE NI VEIVAKAVULICI


Ena so na gauna era na sega sara ni dau vakacavara taucoko na lesoni o ira na *gone lalai*. Ia, ena loloma kei na veivakavulici, sa rawa mo vakavulici ira me ra vakatotomuria na ka o dau cakava. Vukei ira me ra kaya “vinaka vakalevu” ena kena gauna donu. Na nomu ivakaraudaki sa rawa me dua na iyaragi kaukauwa duadua. Era na vulica na gone na itovo, na ivakarau, kei na ivosavosa ni ra raici iko tiko. (Raica na *Veituberi, Me iLutua Ni Noda Bula*, 131.)

Ena dau vukei na nodra vuli na gone ni *dau tokaruataki* vakavuqa na ka vei ira, ka ra dau marautaka sara. Era dau taleitaka me ra dau rogoca tale vakavuqa na veika era sa rogoca oti taumada. Era sa rawa talega me ra vulica na veimalanivosa leleka e tokaruataki ka kilai rawarawa.







Au sa vakavinavinakataka
na noqu matavuvale.



Au sa vakavinavinakataka
na noqu isulu.



Au sa vakavinavinakataka
na noqu itikotiko.



Au sa vakavinavinakataka
na kakana meu kania.